

古體詩

北極春風歌

北極竟起春風柔，朔氣銷爲春水流；流入滄溟無覓處，白熊失所苦沉浮。
未凝飛霰更愁凝，戰戰誰堪履薄冰；瑞雪寒原望不到，北國凜冽卻侵凌（註）。
海水自升冰自融，沿濱洲島恐途窮；波臣頻報龍王喜，擬佔平陸作龍宮。
春風北極兩殊科，此事由人天奈何；若對環保心不惜，試聽北極春風歌。

※註：研究指出北極降雪減少後，北半球歐美諸國的雪害反較過去嚴重。

中秋夜宴作兼寄不至諸君

秋夕佳人難追陪，惆悵不共菊花杯；衷情欲訴嬋娟語，嬋娟罔聞自徘徊。
萬里秋訊君相望，良宵使君安在哉；迢遞關山不可致，情寄明光心尙孩。
霜露已重月華冷，嘉室綺窗莫惜開；若見清輝迎窗入，應是故人送月來。

七律

建國百年有懷

福爾摩莎自卓妍，煙花風月望無邊；日紅霞海蒸瀛島，雪白玉山開杜鵑。
濟困天涯無彼此，揚名國際有英賢；繁華氣象同君見，攜手台灣四百年（註）。

※註：指台灣有文字歷史記載而言，迄今約四百年。

送學兄之英國

陽關三疊送君身，歌遍千聲不足陳；海角應憐無楫客，天涯未隔有情人。
他鄉近望家鄉月，故國遙思異國春；負笈歸來良可待，勤加餐飯自須珍。

七絕

無題

欲待團圓三五期，嫦娥消瘦卻因誰；人間易得長生藥，唯有相思不可醫。

詞

浣溪紗 春雨有懷兼寄友

好雨氤氳褪積塵，細看諸處盡精神，此中有趣趣尤真。
無刻少思身外務，有心多惜眼前人，願君珍重莫違春。

曲

喜春來

天涯獨喜知交在，把酒歡言笑口開。麗句清歌滿樓臺。心合折，明日約重來。

古文

絹絲瀑布記

庚寅年七月，復遊臺北坪頂古圳。下菁山路步道，其途平坦尤宜步行，雖逢小暑，夾道竹木蓊鬱自生涼風，風爽履便至為酣暢。漫遊其間頗有出塵之想，鳥鳴蟬噪交相迎送，神歡體輕隨階上下不覺已至絹絲瀑布。

絹絲瀑布，源出內雙溪，非值雨季其水勢微，望之如絹絲虛垂，故名。常人每言瀑布多喜其聲容壯勝，濺珠噴玉則驚其麗；激石響雷而懾其威，余卻獨愛絹絲瀑布如古之處子佳人，不飾容色以爭媚誇俗；獨居幽谷而有林下風致，裊裊然時伴朝嵐同生，飄飄然欲隨晚風而逝，賦性平淡，淡極近真，箇中真味非練達者不可深味之，故記。

National Chung Hsing University